

## AKAN DATANG

# Gabungan ilham empat penata tari Malaysia, Singapura dipersembah

PERSEMPAHAN teater tari tentang renungan diri yang menggabung idea kreatif empat penata tari Malaysia dan Singapura akan dipentaskan di Panggung Victoria pada hujung minggu ini.

Pementasan yang dinamakan *Introspection* (bermaksud kaji diri sendiri) itu dipersembah kumpulan tari Universiti Nasional Singapura (NUS) Dance Ensemble sempena acara *The Next Wave 2017*.

Antara penata tari itu ialah penari dan pendidik seni terkenal Malaysia Fairul Zahid, yang pernah menerima anugerah Artis Terbaik 2014 di majlis penganugerahan teater Royal Arts Gala, Malaysia. Beliau juga penari Aswara Dance Company dan pensyarah seni.

Bagi pementasan ini, beliau bekerja rapat dengan jurutari tempatan Zaini Tahir, yang juga bertindak sebagai pengarah kreatif persembahan.

Menurut NUS, gabungan kreatif penata dua negara itu akan mencabar kemampuan penari muda menterjemahkan luahan dalaman bagi menggambarkan jalan cerita tentang kajian diri.

Pementasan itu juga akan meningkatkan kesedaran terhadap landskap sekitaran yang menyorot dimensi kehidupan moden sedang nilai tradisional kehidupan perlu terus menjadi pegangan.

Turut menyumbang idea kreatif dalam penataan tari pementasan itu ialah Shabbirul Zaki Ahmad, anggota perintis Dance Ensemble NUS, dan Mirabel Jiang, naib presiden kumpulan itu bagi 2014/2015.

Pementasan diadakan Ahad ini pada 2 petang dan 8 malam, di Panggung Victoria. Tiket berharga \$29 boleh dibeli di laman <https://mysurvey.nus.edu.sg/EFM/se/543BE5C27943A1BE>.



**KAJI DIRI:** Teater tari yang mengajak penonton mengenal diri berjudul *Introspection*, yang dipersembah NUS Dance Ensemble, menggabung idea kreatif penata seni Singapura dan Malaysia. – Foto KINETIC EXPRESSIONS PHOTOGRAPHY